

DOMENIE VII DI PASCHE

Antifone di jentrade cf. Sal 26,7-9

Scolte, Signôr, la vôs dal gno berli.
Il gno cûr a ti ti fevele, ti cîr la mê muse.
La tô muse, Signôr, o voi cirintle.
No sta platâmi alore la tô muse, aleluia.

Si dîs Glorie a Diu.

Colete

Signôr, scolte ben disponût lis nestris preieris
par che il Salvadôr de gjernazie umane,
che par fede o crodin te glorie de tô maiestât,
nus fasi sintî ch'al è presint framieç di nô fint a la fin dal mont
come che lui stes nus à imprometût.
Lui ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 1,15-17.20-26

Bisugne che un al deventi testemoni de sô resurezion insieme cun nô.

Dai Ats dai Apuestui

In chei dîs Pieri al jevâ sù tal mieç dai fradis – si jerin dâts dongje un cent e vincj di lôr – e ur disè:
«Fradis, al veve di sucedi ce che, te Scriture, il Spirtu Sant al veve dit denant trat par bocje di David
a rivuart di Gjude, che si è metût in teste di chei ch'a an cjapât Gjesù. Al jere dai nestris e al veve
vude une part ancje lui te nestre stesse incariche. E di fat tal libri dai Salmi al è scrit: “Il so puest
che lu cjapi un altri”.

Bisugne partant che, di chei che nus an compagnâts par dut il temp che il Signôr Gjesù al à vivût
framieç di nô, scomençant dal batisim di Zuan fintremai a la dì che nus è stât puartât sù in cîl, un al
deventi testemoni de sô resurezion insieme cun nô».

Int presentarin doi: Josef, che i disevin Barsabe e par sorenon Just, e Matie. A faserin cheste preiere:
«Signôr, tu che tu cognossis i cûrs di ducj, fasinus savê, di chescj doi, chel che tu âs sielzût par ch'al
cjapi, tal servizi di apuestul, l'incariche lassade sfurnide di Gjude, lât a finîle tal puest che i
competeve». Po dopo a tirarin bruscjete e i tocjà a Matie, ch'al è stât contât cui undis apuestui.
Peraule di Diu.

SALM RESPONSORIÂL dal Salm 102

R. Benedet il Signôr tal plui alt dai cîi.

O ben:

R. Aleluia, aleluia, aleluia.

Benedîs, anime mê, il Signôr,
dut ce ch'al è in me il so non sant al benedissi.

Benedîs, anime mê, il Signôr,
e no sta lassâ in dismentie nissun dai siei plasê. R.

Come ch'al è alt il cîl a preference de tierie,
cussì al è grant il so boncûr sun chei che lu rispietin;
come ch'al è lontan dal amont il jevâ dal soreli,
cussì al à slontanât di nô lis nestris colpis. R.

Il Signôr al à tirade sù adalt tal cîl la sô sente,
il so ream al rive su ogni robe.
Benedît il Signôr, vualtris siei agnui,

vualtris brâfs, ch'o fasêz ce che us comande. **R.**

SECONDE LETURE Zn 4,11-16

Chel ch'al sta tal amôr al reste in Diu e Diu al vîf in lui.

De prime letare di san Zuan

Miei cjârs, se Diu nus à volût ben, ancje nô o vin di volêsi ben un cul altri. Diu no lu à mai viodût nissun; se si violin ben un cul altri, Diu al reste in nô e il sô amôr in nô al è rifinît. Di chest si recognòs che nô o restìn in lui e lui in nô: lui nus à regalât il so Spirt. E propit nô o vin viodût e o sin testimonis che il Pari al à mandât so Fi sicut salvadôr dal mont. Se un al recognòs che Gjesù al è Fi di Diu, Diu al reste in lui e lui in Diu. Nô o vin recognossût e crodût al amôr che Diu al à par nô. Diu al è amôr; chel ch'al sta tal amôr al reste in Diu e Diu al vîf in lui.

Peraule di Diu.

CJANT AL VANZELI cf. Zn 14,18; 16,22

R. Aleluia, aleluia.

No us lassarai vuarfins, al dîs il Signôr:
o tornarai di vualtris e il uestri cûr al sarà plen di gjonde.

R. Aleluia.

VANZELI Zn 17,11-19

Ch'a sedin un come nô.

Dal vanzeli seont Zuan

In chê volte, alçâts i vòi viers dal cil, Gjesù al preà disint: «Pari sant, tenju cont tal to bonvolê chei che tu mi âs dât, par ch'a sedin un come nô.

Cuant che o jeri cun lôr, jo o tignivi cont tal to non chei che tu mi âs dât e o ai viodût di lôr e nissun di lôr no si è pierdût, fur dal fi de perdizion, par che si colmâs la Scriture. Cumò jo o ven di te e chestis robis ur es dîs biel ch'o soi tal mont, par ch'a vedin in lôr la mê gjonde in dute la sô plenece. Jo ur ai dade la tô peraule e il mont ju à odeâts, parcè che no son dal mont, come che nancje jo no soi dal mont.

No ti domandi che tu ju tiris vie dal mont, ma che tu ju tegnis vuardâts dal trist. Lôr no son dal mont, come che nancje jo no soi dal mont. Fasiju sants te veretât. La tô peraule e je veretât. Come che tu tu mi âs mandât me tal mont, cussì ancje jo ju ai mandâts lôr tal mont. E par lôr jo mi fâs sant me par che ancje lôr a sedin fats sants te veretât».

Peraule dal Signôr.

Si dîs O crôt.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in gracie di chest at di sante religjon,
o podin rivâ a la glorie dal cil.
Par Crist nestri Signôr.

Antifone a la comunio Zn 17,22

Ti prei, Pari, ch'a sedin un,
come ch'o sin un ancje nô, aleluia.

Daspò de comunio

Scoltinus, Diu, nestri Salvadôr,
par che midiant di chescj sacrosants misteris
o podin sperâ che in dut il cuarp de Glesie
si colmi ce che i à za sucedût al so cjâf.

Par Crist nestri Signôr.